

支那  
撰述

石門文字禪  
卷廿七  
之廿八



16  
1123  
14



和16  
1/23  
卷14

石門文字禪卷第二十七

宋江西筠溪石門寺沙門釋德洪覺範著

門人覺慈編錄 西眉東巖旌善堂校

跋

跋唐明皇傳

初明皇聞元魯山之歌歎曰賢人之言也聞左璫訴道迎宋璟不為璟禮則益知其賢何其明也及聞祿山曰胡家不知有父但知有母便遂信之何其暗也孟子曰養心莫大於寡欲欲少縱之則反易如此然能割所甚愛以寧天下與漢高帝鑄印銷印遲速一

支册

石門文字禪卷第二十七

石門文字禪卷第二十七

間耳此其所以再造唐室也

跋狄梁公傳

秦攻魏破之殺魏王瑕誅諸公子而一公子不得乃  
令魏國曰得公子者賜金千鎰匿之者罪至夷公子  
之乳母節乳之俱逃而魏故臣有識乳母者曰乳母  
無恙乎乳母曰嗟乎吾奈公子何故臣曰今公子安  
在吾聞秦令曰有能得公子者賜千金匿之者夷乳  
母儻知其處盍不言乎乳母曰吁我不知公子處借  
吾知之終不可言故臣曰魏國正破亡族已滅矣尚  
誰爲乎乳母吁而言曰夫見利而反上逆也畏死而

棄義亂也恃逆亂以求利吾不爲也遂抱公子藏太  
澤中故臣告秦軍秦軍追見射之乳母以身蔽矢著  
身者數十乃俱死秦王聞而貴之葬以卿禮東漢李  
善南陽李元奴也家疫死止孤兒續始生數旬而貴  
以萬數奴婢共議謀殺續分其產善潛負續逃亡隱  
山陽瑕丘界中親自哺養乳爲生漚續雖在孩抱奉  
之不一異長者有事輒跪請白然後行之續年十歲善  
與歸其邑修理舊業鍾離意時爲瑕丘令上書薦之  
光武詔善及續並爲太子舍人魏節乳母漢李善古  
之奴婢也而其所爲卓越如此予聞虎生三日其氣

食牛馱驄七日而超其母蓋其種性殊特不幸而趣異類中耳若二人者殆功名富貴者事也又可以品類拘之乎唐則天皇后受夫顧託而欲奪以自有哥舒翰提兵三十萬而北面事賊此真奴婢豈定能功名富貴者乎

跋北里誌

春秋傳書六鷁退飛石墮五微事也何足書乎先儒曰聖人之意以謂如鷁與石無預於道德性命之理且猶謹嚴詳次如此況道德性命乎北里誌戲劇之文而達道校證藏之豈五石六鷁之意乎舒主曰司

馬君實平生大過人者臨事不苟於達道亦云

跋達道所蓄伶子于文

風行水上渙然成文者非有意於為文也余讀此傳蓋通德娓娓而語子于筆追而書之非有意也然通德所論惠男子殆天下名言吾以謂子于之室有此婢如維摩詰之有天女也達道手校諸書而此本最美非好古博雅何以至是司馬君實無所嗜好獨畜墨數百爾或以為言君實曰吾欲子孫知吾所用此物何為也達道之畜書其亦司馬之墨癖也

跋那根矩傳

孔北海年十六時能舍匿山陽張儉事泄兄弟及母  
 三人爭死竟坐兄衰北海因是顯名遼東太守公孫  
 度欲殺劉政政先依根矩矩匿之月餘以付太史子  
 義既而謂度曰政已去君之害豈不除哉度曰然根  
 矩曰君之畏政者以其智也今政已免智將用矣尚  
 奚拘政之家不若赦之無重悲也度乃出之棄又資  
 送政家皆歸故郡嗚呼東漢號多氣節之士其天性  
 哉方張儉劉政之窘而遇北海兄弟太史子義根矩  
 雖困於亨蓋其平生取友護助何所憾焉韓退之誌  
 柳子厚愛其請代劉夢得播州曰嗚呼士窮乃見節

義今夫平居里巷相慕悅酒食遊戲相徵逐翊翊強  
 笑語以相取下握手出肺肝相示指天曰涕泣言死  
 生不相背負宜若可信一旦臨小利害僅如毛髮比  
 反眼若不相識落陷筭不一引手救反擠之又下石  
 焉者皆是也此宜禽獸所不忍為而其人自視以為  
 得計使聞子厚之風亦可以少愧矣予聞退之之言  
 太過及親嘗之乃知此曹今古一律也借能過之安  
 能已之哉

跋魯公與郭僕射論位書

魯公作字多擘窠大書端勁而秀偉黃魯直云此所

期無不欲高照千載者此帖草略匆匆前所未見開  
 軸未暇熟視已覺粲然忠義之氣橫逆而點畫所至  
 處便自竒勁公嘗謂盧杞曰朝廷法度豈更堪公破  
 壞也於此又曰朝廷綱紀須共存正凜然想見其為  
 人蓋公所遭之時如此而所守之道不得不然故倉  
 卒未敢忘國之綱紀也余私有感於中者因記於此

跋杜子美祭房太尉文藁

房瑄之賢盧杞之不肖讀其傳曉然易分也然睢陽  
 之敗由瑄魯公被害杞實使之校一者之設心則終  
 不能優劣而甫稱瑄之材雖困蹇以死益堅壯非忠

義激烈篤於自信其能爾耶疑史記賀蘭不予南霽  
 雲兵事若不直雖然哥舒翰之臣祿山天子西奔天  
 下怨之而高適乃表雪其事稱舒翰忠義有素而以  
 病奪其明將軍三十萬而低首事賊非叛乎從而文  
 其罪非欺乎而甫亦嘗以舒翰適為賢豈史皆不足  
 憑而甫之稱無不真者耶

跋東坡山谷帖二首

東坡山谷之名非雷非霆而天下震驚者以忠義之  
 効與天地相始終耳初不止於翰墨王羲之顏平原  
 皆直道立朝剛而有禮故筆蹟至今天下寶之者此

期無不欲高照千載者此帖草略匆匆前所未見開  
 軸未暇熟視已覺粲然忠義之氣橫逆而點畫所至  
 處便自竒勁公嘗謂盧杞曰朝廷法度豈更堪公破  
 壞也於此又曰朝廷綱紀須共存正凜然想見其為  
 入蓋公所遭之時如此而所守之道不得不然故倉  
 卒未敢忘國之綱紀也余私有感於中者因記於此

跋杜子美祭房太尉文藁

房瑄之賢盧杞之不肖讀其傳曉然易分也然睢陽  
 之敗由瑄魯公被害杞實使之校二者之設心則終  
 不能優劣而甫稱瑄之材雖困蹇以死益堅壯非忠

義激烈篤於自信其能爾耶疑史記賀蘭不予南霽  
 雲兵事若不直雖然哥舒翰之臣祿山天子西奔天  
 下怨之而高適乃表雪其事稱舒翰忠義有素而以  
 病奪其明將軍三十萬而低首事賊非叛乎從而文  
 其罪非欺乎而甫亦嘗以舒翰適為賢豈史皆不足  
 憑而甫之稱無不真者耶

跋東坡山谷帖二首

東坡山谷之名非雷非霆而天下震驚者以忠義之  
 効與天地相始終耳初不止於翰墨王羲之顏平原  
 皆直道立朝剛而有禮故筆蹟至今天下寶之者此

也予於重巖訥室觀此帖皆其海上窮困時自適之語然高標遠韻凌秋光磨月色令人手玩一飯不置若訥當藏之名山以增雲林之佳氣前代尊宿火浴無燒香偈子山谷獨能偈之初見羅漢南公化作偈其略曰黑蟻旋磨千里錯巴蛇吞象三年覺天下衲子聽瑩十年晦堂曰魯直作此有據乎亦意造爾山谷曰吾聊爲叢林戲耳晦堂大笑曰豈可以般若爲戲論乎山谷始悔前所學未登本色鑪鞴乃卜居于庵之窅方知晦堂真不請之友耳今讀此書乃是未見晦堂時語也不然安有吹劍語乎

跋東坡與佛印帖

東坡騎鯨上天去十九白矣平生文章流落世間者所在神物護持然士大夫罕蓄之多見山人野士之室汝水叟禪者出此帖示予雖其一期醅酢之語而謙光燭人三復之想見幅巾杖屨條然行僮石水溢間如淵明在柴桑斜川時某題

跋東坡平山堂詞

東坡登平山堂懷醉翁作此詞張嘉甫謂予曰時紅粧成輪名士堵立看其落筆置筆曰送萬里殆欲仙去爾余衰退得觀此於祐上座處便覺煙雨孤鴻在



目中矣

跋東坡與荆公帖

予嘗見東坡與荆公帖謂少游曰願公稱揚之使增重於世又舉魯直自代表曰魁壘之才足以冠絕天下孝友之行足以追配古人是四老俱登鬼錄覽此翰墨尚足以增山川之勝氣也

跋東坡老木

東坡婆娑林丘如此老木而山谷以筆端之口為形容之華光鉢囊中乃一時頓有此兩玉人耶

跋東坡悅池錄

歐陽文忠公以文章宗一世讀其書其病在理不通以理不通故心多不能平以是後世之卓絕穎脫而出者皆目笑之東坡蓋五祖戒禪師之後身以其理通故其文渙然如水之質漫衍浩蕩則其波亦自然而成文蓋非語言文字也皆理故也自非從般若中來其何以臻此其文自孟軻左丘明太史公而來一人而已然予有恨恨其窺夢幻如霧見月雖老而死古今聖達所不免譬如晝則有夜而東坡喜學煉形蟬蛻之道期白白而骨飛竟以病而歿使其如魯仲連之不受萬鍾之位而肆志則寧復有遺恨哉佛鑑

能珍敬其書則其趣味乃真是山邊水邊之人與夫  
假高尚之名心悅孔方道人者異矣

跋東坡緘啓

東坡海外之文中朝士大夫編集已盡雖予之篤好  
者亦以爲無餘矣佛鑑輒出此帙爲示皆中朝士大  
夫集中所無者山林之人泯泯枿枿若無所用而其  
志好尚亦清絕哉譬如無雲之月有目者皆愛仰之  
況斯文乎

跋東坡書簡

王逸少骨鯁顏平原剛正兩公皆有立朝大節而後

世以字畫稱予嘗嗟惜之然名德之重故世珍其筆  
蹟蓋理之固然東坡之於王顏又其逸羣絕塵者其  
法權極可寶秘宣和四年人白覺慈軸以來示予予  
忻然喜其嗜好若可教也

跋山谷所遺靈源書

熙寧元豐之間西安出二偉人徐德占一旦與草萊  
與人主論天下事若素宦於朝黃魯直氣摩雲霄與  
蘇東坡並馳而爭先二公皆名震天下聖世第一等  
人也而詩詞所寓翰墨之妙拳拳服膺於靈源大士  
如此則知彼上人者必有大過人者耳一以達摩正

諦不斷才一縷為憂一以願得一雲門為言豈非念其所負不可以蹤蹟者耶高安道人誼叟久從之游蓄此書出以示予予祝之使藏之名山庶百千年之下知江南道德所在未全寂寥也

跋山谷雲峯悅老語錄序

山谷筆回三峽不露一言雲峯舌覆大千更無剩法昔由龍山父子雖被執贖今朝虎溪兒孫應增冷笑咄寒山子道底

跋山谷筆蹟

山谷為予言自出峽見少年時書便自厭此帖在龍

舒時作自然有一種勝氣未易與俗人言也當有賞音耳

跋山谷帖

山谷翰墨風流不減謝東山而書詞鄭重傾倒於華光如此予疑百世之下有讀之者知華光後身支道林哉

跋行草墨梅

山谷醉眼蓋九州而神於草聖華光道價重叢林而以筆墨作佛事兩翁並軸如夏白松下見婁師德永禪師像於邢和璞甕中耳

跋橘洲圖山谷題詩

予棲遲橘洲斷岸甚久別來無夕不在夢偶開軸見之如倚法華臺引鏡也讀山谷語如幅巾相從道林路時

跋山谷五觀

舒王在鍾山多與禪者游王以宗乘關捷問之莫不瞠若若以膚淺問之莫不聽瑩於是大訝其寡聞嘗問一僧五觀法使誦之往往不能句者嗚呼非施法之過學者亦罪焉以其不能從師授也山谷冠冕道德偉俊聳于縉紳宜其倚花叫飲高追晉宋風流之

游方其窮約乃知跣趺而食又作觀法非真已好之且欲移於天下其信道為法之勤可謂透脫情境者耳逢原畜此疾欲以示學者庶幾其有能動心者耳

跋黔安書

王家父子翰墨流落後世不少而所見皆弔喪問病之帖豈其得意之書已為當時賢士大夫所藏世不得而見之耶弼上人處見黔安青石半帖皆與村落故人語然其傲睨萬物之意不沒更百年後斯帖當亦貴耳

跋山谷字二首

山谷初自鄂渚舟至長沙時秦處度范元寔皆在予  
 自三井往從之道人儒士數輩日相隨穿聚落游叢  
 林路人聚觀以為異人今餘二十年予再游長沙山  
 林間往往見其筆札此帖此簡前嘗見之宣和二年  
 秋八月至法輪竦上人出以為示玩之不忍置魯女  
 有遺荆釵而泣者路人笑之曰以荆為釵易辨女乃  
 泣何也女以手掠髮曰非以其難致也以其故舊耳  
 予所以玩之者實鍾魯女泣荆之情  
 山谷初謫人以死弔笑曰四海皆昆弟凡有日月星  
 宿處無不可寄此一夢者此帖蓋其喜得黔戎有過

從之詞其喜氣可搏掬山谷得瘴鄉有遊從其情如  
 此使其坐政事堂食箸下萬錢以天下之重則未必  
 有此喜也

跋珠上人山谷醮池詩

予紹聖初留都下聞士大夫藉藉誦青石牛詩而此  
 四絕尤著聞恨不見此老閱三年遊石門林下識君  
 實骨面善談笑相從最久時珠禪垢面不襪然已超  
 卓後二十餘年予還自海外而君實化去久矣丁酉  
 坐夏洞上有鴨步而至者問之乃吾向所識不襪公  
 也於是甘吾老矣夏休珠將經行湘山袖此卷來讀

之龍蛇飛動凌跨韓柳之氣糠粃王侯之韻如其無恙時陰晚坐覺山川增勝爽然忘其孤廢也湘山多高人識青石牛甚衆珠可以示之使其韻厚博衡霍固不佳哉

跋與法鏡帖

山谷作黃龍書時與予同在長沙碧湘門外舟中今餘年佛鑑出此以示予曇諦見前身麀尾山谷醉中仙去此帖墮空之垢被也

跋石臺肱禪師所蓄草聖

少游此詩荆公自書於紈扇蓋其勝妙之極收拾春

色於語言中而已及東坡和之如語中出春色山谷草聖不數張長史素道人遂書兩詩於華光梅花樹下可謂四絕予不曉草字開卷但見其雷砰電射揭地祇而西七曜耳吁哉異也政當送與龍安照禪師使一讀之

跋山谷筆古德二偈

此兩詩唐智閑禪師所作也世口膾炙之久矣而莫知主名豈山谷未敢必誰所作耶覺思示山谷在華光時筆此翁以筆墨爲佛事處處稱贊般若於教門非無力者也今成千古爲之流涕書之

跋山谷雲庵贊

雲庵住廬山時山谷過焉相與游鸞溪坐大石上譬  
窠留題其法喜之游如黃檗裴公乃作此贊後二十  
餘年得於衡陽毛氏之家持以還長沙開法長老覺  
慈寔其的孫時年二十三歲即以付之臨濟正脉使  
流通不斷乃無所媿此贊其敬之哉宣和五年中秋  
前一日題

跋東坡山谷墨蹟

予自南來流落山水久不見律人便覺曾次勃土可  
掃宣和二年冬涌師於湘西古寺中出以為示如見

蘇黃連壁下馬氣如吐霓也

跋山谷字

山谷翰墨妙天下蓋所謂本分鉗鎚至於說禪自到  
於三老之後則似攬奪行市奇傑之氣光風霽月如  
珥立殿陛之下何其照耀哉漳州正道書記於東山  
雪朝出以相示便覺增清山川精神秀發道雖一枝  
一鉢求實於已者無有然骨董箱有此軸殆可與連  
城照乘爭價也

又詩

山谷論詩以寒山為淵明之流亞世多未以為然獨

雲巖長老元悟以爲是此道人村氣而俎豆山谷靈源之間也已可驚駭乃又能斷評詩之論殊出意外此寒山詩也以山谷嘗喜書之故多爲林下人所得顏平原方乞采而山谷已謝得米粟之非胡椒八百斛之家也

跋叔黨子

王子敬童稚時作字行草已超故方引紙著腕右軍從後掣其筆不獲乃歎曰是兒他日名當大成予觀叔黨行草皆蟬蛻墳塵之類筆法通亞乃翁矣惜其早世不秋庸詎不以此郎姬子敬耶邵陽儉上人雨

歇攜此帖見過倏然如見父子角巾竹杖行小港榕林之下不勝清絕建炎二年三月十八日

跋本上所蓄小坡字後

雞蘇本草龍腦薄荷也東吳林下人夏月多以飲客而俗人便私議坡誤用雞蘇爲紫蘇可發吳儂一笑予將發鷺溪上人以此軸爲示筆勢飛動皆學坡而未臻坡嶮處者要之如馬巷中逢王謝家子弟步趨狀貌蘊藉風流有自來矣覺範題

跋了翁詩

仁者難逢思有常平居慎勿待何妨爭先世路機關



惡近後語言滋味長爽口物多終作疾快心事過必  
 為傷與其病後求良藥不若病前能自防  
 右了翁送其姪剛勝柔詩勝柔過南昌出以為示曰  
 伯氏祝曰儻見覺範使為汝說破予曰翁欲汝知口  
 只好喫飯耳

跋了翁書

宣和二年夏得翁書前去無日矣能復一來相見乎  
 翁平生剛方吐言如刀鋸而此書若悽吟私怪之明  
 年四月遣書走山陽八月人還云翁方發書日下世  
 矣蓋四月九日也聞之酸鼻累日翁視死生一戲耳

予重為天下惜此人品翁知國如陸忠公臨大節不  
 奪如顏魯公文章光明瞻博如白樂天通達宗教如  
 裴公美然四公者皆享富貴建功名死無遺恨而翁  
 兼四公之長而以一斥不能復遂坐廢三十年予所  
 以追悼而不去心也八月七日方飯僧薦冥福病臥  
 刺然刀畫而南州珠上人攜此軸來讀之而長歎哲  
 人逝矣予何所稅駕乎此去死生一決耳珠包腰一  
 鉢苦硬有膽氣而能蓄此書今叢林禪和子以為何  
 種故紙然則珠殆亦有佳處因為流涕而書之

跋瑩中帖

瑩中竄海上而名震天下不減司馬丞相之在洛中  
時平生多與山林之人游處處見其翰墨雖戲語亦  
如雪中春色予觀堪公所蓄答仰山真慧禪師簡重  
而謹嚴如其爲人味其立朝盡節無媿宋廣平陸宣  
公也

跋瑩中詩卷

了翁徜徉垢汗不擇香臭而至山水間便能賦山簷  
墨梅乃爾暴清絕耶予政和春過衡陽道權出以相  
示如見抵掌談笑時

跋江表民願文

世尊論學道特言富貴爲難表民官爲左司風節凜  
然天下畏仰貴顯矣而與其夫人俞氏一飯奉身清  
淨自活畢世真如德童子有德童女豈特求於今  
爲鮮雖從古人中求亦無有也予閱其願文廣大堅  
固深切著明眞黑暗崖之火炬生死海之舟楫爲之  
序者淨慈禪師退然才中人而以大法爲已任如雪  
竇爲之跋者延平了翁立朝正色剛而有禮愈斥而  
愈忠如魯公皆表民之友也而三友者聯翩欲刪去  
予而自游普賢願海又可乎

跋李商老詩

予至石門杲禪出商老詩偈巨軸讀之茫然知此道  
人蓋滑稽翰墨者也又欲人社作雲庵客試手說禪  
便吞雲門臨濟如虎生三日氣已食半衲子譁曰甘  
露滅非錯下注脚

跋徐洪李三士詩

陳瑩中嘗問予南州近時人物之冠予以師川駒父  
商老為言瑩中首肯之駒父戲効孟浩然作語如王  
謝家子弟風神步趨不能優劣商老和之如劉安王  
見上帝大言不遜豪氣未除獨師川有句在暮山烟  
雨裏西洲落照中未暇寫也

跋蘇子由與順老帖

子由每多疾病則學道宜多憂患則學佛宜常坐當  
人兩謫高安多與山林有道者語知其為排遣憂患  
者也順老予時拜之又吾雲庵賢之滴然流涕而書  
云

跋張七詩

玉不可種也而孝之至則種玉亦生泉不可呼也而  
忠之至則呼泉亦冽虎不可使令也而有德者役以  
橐經乙不可教誨也而有義者致其同室予觀兩張  
之詩引物連類折之以至理而秀傑之氣不沒讀之

使人一唱三歎豈筆端有口之徒歟

跋高臺仁禪師所蓄子宜詩

曆公以功業著詩律傳者少自廢放山林間與衲子遊其語便爾清熟此柳子厚所謂詩人以窮乃工殆非虛語

跋道鄉居士詩

道鄉以說禪口談醫國法門雷霆一世初非以詩鳴也而此詩句句有法蓋其曾次如春之盎盎著物成容今既已矣萬人何贖哉儼師題于衡山之麓跋鄒志完詩乃其子德久書

道鄉文章種性自然如五色鳳此詩乃浴天池時容光也其雛筆法已能追蹤山谷之氣讀之令人想見寒驢風帽如宗武扶子美醉吟詩也

跋四君子帖

秦少游舌頭無骨王定國察見淵魚山谷口業猶在道鄉習氣不除華光不語如雷

跋呂鎮公詩

右惠照院見太師鎮國呂公留題一首深清雄麗有愛君報國之志時公方尉新昌實生太尉吉甫以道德為神考所敬與舒王上下議論遂參大政文章翰

墨雷寔一時福祿壽考逮事三朝天下學者宗之昔李邵以高才博學爲南鄭幕門侯吏而其子固爲東漢名臣豈所謂隱德報應不身嘗之而及其子孫者乎予於太師鎮國公亦云

跋李豸東坡文

東坡以建中靖國元年七月二十七日歿於常州時錢濟明侍其傍白曰端明平生學佛此日如何坡曰此語亦不受遂化李豸爲文以弔之曰道大難名才高衆忌皇天后土知平生忠義之心名山大川還千載英靈之氣士大夫稱其詞該而美今錄以示常道

人亦可以舉似山中諸道友也

跋養直可師唱和真隱詩

予久不見養直時時想見其墮幘醉時忽閱此詩如行野渡春色中雖益益醇醲然終有一種清絕氣味可上人語迅快如漱壑夜泉響掃窓春霧空不類某肚阿師語仲伯連壁土也而皆友吾巽中傳曰觀其所以游因以知其爲人吾於巽中亦云

跋養直詩

宣和三年三月予遷居水西南臺寺初六日顛風攪林東軒小寢俄大雨起步脩廊復坐頽然昏睡南州

撰述  
道崇難者持此軸來隱几讀之如觀飛菟頓塵追風  
趨日也然其詩詞所及皆予故人而予亦嘗落憫憐  
中蓋方竄海外時帖也昔曾魯公問予曰蘇養直聞  
齒少而詩老恨未識之子見其詩否予曰李太白詩  
語帶烟霞肺腑纏錦繡以予觀養直之詩逮又過之  
魯公駭予此論今數詩惜公不見以驗前語耳

跋謝無逸詩

臨川謝無逸布衣而名重搢紳於書無所不讀於文  
無所不能而尤工於詩黃魯直閱其與老仲元詩曰  
老鳳垂頭噤不語枯木查牙噪春鳥大驚曰張晁流

也陳瑩中閱其贈普安禪師詩曰老師登堂擿大鼓  
是中那容嗇夫喋歎息曰計其魁傑不減張晁也二  
詩於無逸集中未爲絕唱而陳黃已絕倒無餘惜其  
未多見之耳然無逸又喜論列而氣長詩尚造語而  
工置於文潛補之集中東坡不能辯文章如良金美  
玉自有定價殆非虛語也予方以罪謫海外無逸適  
過廬山見吾弟超然熟視久之意折曰吾此生復能  
見覺範乎語不成聲乃背去後三年予幸蒙恩北還  
而無逸乃棄予而先焉因與超然對榻夜語及之不  
自覺淚殷枕也嗚呼無逸東隣有甯生者二十餘以

鏤刻為菩薩像每過無逸恬退趨去俄游京師以其  
 役得將仕郎而還華裾細馬閭里聚觀無逸出門值  
 之為避路門弟子為不懌累月嗚呼無逸有出世之  
 才年未五十命不沾殞傾大命曾東鄰甯木工之  
 不若嗟乎惜哉

跋無盡居士帖

無盡登庸百僚畏壘坐政事堂德長於兩府諸公自  
 劉中書吳門下皆昆弟畜之觀其退歸山林與衲子  
 游書詞諄諄不趨如骨肉然賢者莫不怪之安知此  
 老人以法為親乎龍安照公倚公之風遂托名不朽

其亦老贊公盧玉川希上人之流亞也耶

跋蔡子因詩書三首

歐陽文忠公嘗非笑肥字而誇杜子美獨貴瘦硬東  
 坡作詩曰杜陵論書貴瘦硬此論未工吾不平豐妍  
 瘦容各有態飛燕玉環誰敢憎予因此帖可謂豐妍  
 者也觀其俊氣橫逸不受富貴鞚勒之韻宜從古人  
 中求宣和元年十月八日臨川瞻上人出以為示便  
 覺神魄飛越於鐵甕城之下瓜洲杳靄之間

文章天下第一數東坡子因蔡氏子弟而飲食夢寐  
 以之其種性妙非習俗所能移使東坡而在見子因

當不減張曲江之與李泌也

予久不見夢蝶偶得此詩湘西山水間時松風盤空  
林月滉蕩如顧虎頭對劉琨展其畫像也

跋李商老太書雲庵偈二首

商老以大父事雲庵以伯父事天寧則予蓋其叔父  
也仰山曰東院師叔若在惠寂不到寂寞商老寂子  
後身也然甘露滅固未死而商老與其弟未嘗不啼  
飢其大言以詬罵魔佛高自許可蓋習氣也

近世要人達官其氣焰摩層霄而門可附而炙手者  
不翅百千然其語言翰墨人見之皆如拒頑百姓見

催租文引恚視之不棄擲幸矣商老灌園脩水之上  
而筆畫一出人爭傳寶以相矜誇吾是知道德無貧  
賤也覺慈生一十年去年從余而知有商老偶出所  
畜一軸見嬉喜而書其尾且以雪道向無知之恥云

跋韓子蒼帖後

蘇東坡伯仲文章之妙無媿相如子雲而其見道之  
大全則楊馬瞠若乎後子蒼文字師法蘇氏西蜀後  
來之駿也讀其問照公向上一路後照未見訓語予  
為代之曰不辭向汝道只恐撞見劉幽求大帽壓耳  
手提油子蒼他日見之定是無語



跋太師試筆帖二首

此帖骨氣深穩姿媚橫生其得意時筆也不然何其如行雲流水之閑暇也予臥疴逾月偶閱之覺疴不辭而去乃知檄愈頭風非虛語耳

予觀太師楚國公之書骨含富貴積學之至神氣蓋入然付其姪以寶公詩其外護欲傳之子孫為無窮家法也

跋公袞帖

見蛇鬪而筆法進聞雞聲而遂能神東坡以謂寧有存法與神于胷中而能學書者乎予觀公袞行草既

不用法亦不祈其神媿媿意盡則止耳

跋三學士帖

秦少游張文潛晁無咎元祐間俱在館中與黃魯直居四學士而東坡方為翰林一時文物之盛自漢唐已來未有也宣和四年七月太希先倒骨董箱得此三帖讀之為流涕嗚呼世間寧復有此等人物耶

跋蘭亭記并詩

宣和四年夏彌月不雨稻田龜兆出予晨興垂頭坐西齋方與造物者游而厨丁聿來告米竭余作白眼久之希先送此軸來索跋欣然見王子敬諸君子忘

其厨丁厨丁求與决予曰當以三夜用事正不必逼入也

跋荆公元長元度三帖

予兒時劇於隣家見壁間有詩曰是非不到釣魚處榮辱常隨騎馬人今日見此三帖偶憶前句

跋百牛圖

畫工能為神鬼之狀使人動心駭目者以其無常形無常形可以欺世也然未始以為貴唯犬馬牛虎有常形有常形故畫者難工世之人見其似則莫不貴之畫牛之法徑寸者不刷毛予觀此圖非特入法凡

百尾喜怒俯仰小大伏立趨並浮鼻荷痒盡其情狀意非畫師殆高人韻士以寓其逸想耳予老住江村而比道林嶽麓之富其半每以谷量日夕蓋拾礫追逐叱叱於田畝之中厭飫矣而全美乃以此軸為示何哉予以湘西之雲塢為畫筍則全美必以此圖為作

跋周廷秀訓唱詩

宣和二月初吉日予送客松下淺丘縱望廷秀一髯男子但是時湘西雪盡眾峯蒼然我與廷秀皆是畫圖廷秀袖出與張公訓唱之詞讀之便覺與眾峯爭

秀豈其媿從聚落中來故以此句彈壓清境耳

跋順濟王記

東坡昔自定武謫英州夜宿分風浦三鼓矣發連司知有後命遣五百人來奪舟東坡曰乞夜櫓及星江就聚落買舟可乎使者許諾即默禱順濟王曰軾往來江湖之上三十年王於軾為故人故人之失所當哀憐之達旦至星江出陸至豫章則吾事濟矣不然復見使至則當露寢浦敘言未卒風掠耳篙師升颿颿飽炊未及熟已渡楊瀾泊豫章日亭午嗚呼順濟之威靈為江湖之益者不可悉數獨分風送東坡南

去此心日月不能老也其英特之風不減李逢吉禮

陸宣公也

跋李成德宮詞

唐人工詩者多喜為宮詞天階夜月涼於水臥看牽牛織女星玉容不及寒鴉色猶帶朝陽日影來世稱絕唱以予觀之此特記恩遇踈絕之意於凝遠不言之中非能模寫太平藻節萬物讀成德所作一百篇知前人之未工也其收拾道山絳闕之春色刻畫玉樓金屋之情狀使海山瀕海之人讀之如近至尊非其才當世何以治此上元日題

# 石門文字禪卷第二十七

丹陽居士賀學仁保男懋初愛燈共施贊刻此  
 石門文字禪第二十七卷 海菴了緣居士對  
 長洲徐普書 進賢萬鐮刻  
 萬曆丁酉仲冬徑山興聖萬壽禪寺識

## 石門文字禪卷第二十八

宋江西筠溪石門寺沙門釋德洪覺範著  
 門人覺慈編錄 西眉東巖旌善堂校

疏

請悟老住惠林

瑞光表裏渾圓珠遺影迹淨慈縱橫無礙玉立精嚴  
 兩翁皆化行京華一旦遂道徧天下每追惟其高韻  
 邈難繼其後塵欲扶雲門已墜綱宗誰決先師未了  
 公案恭惟其人淨慈真子瑞光嫡孫言行信於叢林  
 聲價重於吳越無生之句善嬰兒哆啞法門獨脫之

機入師子奮迅三昧願膺睿旨來振祖風施大士法  
喜之珍洗小根禪誦之垢幸回法馭成就勝緣

又諸禪疏

常光現前廓周沙界大智成就不隔纖毫自然蟬蛻  
根塵之間安用龜藏語默之外當有達識共賞此音  
伏惟某人正眼甚明道根久固綽有遠韻爰自妙齡  
雲行鳥飛川流嶽峙觀其措置實宗門之爪牙見其  
施張蓋法窟之頭角以身徇道當無繫於去留為法  
求人豈有拘於喧寂所期甚大幸毋固辭

請臬老住天寧

雲門之句裏呈機粲玲瓏之鉞芥洞山之正中妙叶  
走圓轉之盤珠持臨濟之門風行黃檗之照用奪人  
境於棒下分賓主於喝中三宗盛集於帝京諸老大  
揚於佛事伏惟某人道韻拔俗英姿逸羣披沙得金  
剖石逢玉識黃龍窟中頭角振青鸞溪上風雷十年  
之幽蘭林香一旦之穎錐囊露王張法席厭飫名山  
每欲晦藏輒自昭著其自治雖無求於世然寓世當  
循緣而行奚必山林終勝朝市今者覺天梵侶上國  
寶坊佇法馭以重臨期宗風而大振遙知起定因緣  
助發慈心想見肯來龍象擁隨高步

山門疏

嵩山宏別傳之宗終依帝里天台修遠舉之行尚遊  
 人間觀其迹若未棄世緣論其心則深尊法道蓋至  
 人度生初不泥其出處菩薩護念亦將泯其靜喧仰  
 前鑑之昭然宜後昆之取法恭惟其人卓有實行號  
 稱飽參冰霜居懷嚴冷照物平生刻苦於道諸方信  
 服其誠其閱世也如風行空去來無礙則循緣也如  
 月印水成破因時昔懷雲泉終老之歸偶爾西去今  
 念王臣外護之意翻然北來期擊電機鋒重施使正  
 法眼藏不滅

請靈源外座

香象本狂依寶坊而馴伏怒虎方鬪遇禪者之解紛  
 顧惟齒髮之所慙曾彼性靈之不若聞斯妙義皈命  
 慈嚴恭惟其人如月在天非獸汗而匿照如雷振物  
 豈擇地而發聲開傳法馭之肯來故已輿情之喜慳  
 雲山在目何妨掉臂即行龍象擁隨正好逢場作戲  
 副我有求之懇願開無礙之門

請一老外座

真誠所置聖果證於履聲正信之深空義現於猊座  
 况隣清淨之境親瞻知識之儀恭惟其人華藏親孫

佛印嫡子晨鐘暮鼓揮雙劍之鋒鏘水鳥樹林露臥  
龍之頭角法不孤起此為時節之因緣大衆必臨願  
聽緒余之聲歎

請山老住雲巖

敷演佛乘資延睿筭僉求達識成就勝緣振列聖已  
墜之綱宗行初祖不傳之正令真非掩偽苟徇道俗  
之言公則生明特用叢林之議伏惟某人隨機說法  
籍教悟宗名為東林橫枝其實泐潭正脉少時橫行  
海上老來古寺城隈惟以薪而續牀分栽田而博飯  
然唯雲巖勝利實曰江國上游宗旨之淵源緇衲之

都會鳳山歸去瓶盂是處為家猊座重登萃木逢場  
作戲請提雅曲大衆欣聞

請藥石榜

耆年日已凋喪叢林今遂寂寥王官玉石俱焚學者  
涇渭不辨謂之受道其實走名賴老成之典刑為後  
昆之軌範恭以新命其人滴水滴凍知果知因唯顯  
晦水到渠成使魔外風行草偃一段勝事千目同觀  
龍窟沙頭最初解開布袋鳳凰山下末後把定牢關  
道不虛行法固如是特致谿蘋之具以表山門之儀  
欣然肯來豈勝幸甚

請崇寧茶榜

出則為人興化是何心行不如諸佛曹山空熱肺腸  
 雖然二老英雄未免一場敗闕欲圓道眼別有妙門  
 恭惟某人本色鉗鎚逸羣聲價現成活計更不覆藏  
 肅道者白牯牛兒騎來露地南禰頭赤班蛇子拈出  
 驚人太光西祖之機上祝南山之壽清風江上孤舟  
 不涉程途明月洲頭一句却分寶主寶坊在邇香飯  
 具陳將開選佛之場願受最初之供現前法侶同賜  
 證明

請道遙耳老茶榜

寶几珍御特興同體之大悲白牯狸奴更入徧行之  
 三昧要當語絕滲漏不令機昧始終如百花醴味絕  
 中邊如三點伊勢分寶主惟靈源洞明此旨坐昭默  
 獨提正宗雅聞宜公禪師久親此老法席長眉尊者  
 爭傳親見佛來大耳沙彌自謂久辭祖矣浮塵滅盡  
 化愛憎為平等之光大用現前投同異入寂滅之海  
 一言相契千里同風敢違十方蘭若之規敬薦一會  
 伊蒲之饌眾所欽佇儼然肯臨幸甚  
 請準和尚住黃龍

磨蕪庵畔言回智照之光選佛堂前喝下證心之第



是續諸佛之壽命為大法荷擔之叢林興自江西家  
世獨聞天下老南設三關之問勃然中興關西藏一  
點之機窅然深遠恭惟其人關西真子老南的孫貶  
剝諸方踈通正脉自石門而遷幕阜如別業而歸故  
園不離先祖道場旃檀林無別樹復唱舊時雅曲優  
鉢華已重開便請拈提不勞辭讓

請湘公住神鼎

道不可傳則釋迦不當饒舌法如可說則維摩豈得  
無言賴離微不犯之鋒機決祖宗未了底公案要須  
圓融之士密開方便之門恭惟其人少小偶家瀉山

寅緣親承空印譬如懶融道者坐致雙峯祖師熏蒸  
見聞霜露成熟蘊醉顯舉足之辯有白雲越閩之機  
領神鼎之名山適叢林中興之日行雪竇之正令酬  
王臣外護之恩

請寶覺臻公住天寧

佛之法道世所追崇雖外護付諸王臣然荷負必須  
龍象咨之於衆愛憎或出於人情公則生明真偽難  
逃於智鑒來膺妙選果得耆年伏惟寶覺大士臻公  
以禪寂為家鄉以翰墨為遊戲閒房古寺甘畢生於  
折脚鐺中各夢同牀曾失笑於破頭山下而判府待

制妙於龐老識丹霞初不出門應歎仲尼知伯雪猶  
資擊自今日重新法席一時共贊天寧演暢宗乘聚  
三湘之雲衲祝延睿筭同萬國之山呼

請殊公住雲峯

有志於立事而事之竟成無心於求名而名之不捨  
似水滴石積之以日而石自穿如麝匿香覆之以缶  
而香愈著非形勢之激爾蓋物理之固然恭惟某人  
東林廣惠之曾孫南嶽慈覺之嫡子撫謙榮利嘉遁  
叢林王臣悅聞授以傳衣之職道俗勤請願聞飛錫  
之來龍象畢臨山川改觀昔時把定俗子涎我白疊

巾今日放行真珠撒出紫羅帳

請道林雲老住龍王諸山

諸方叢社盛莫甚於湘中五派家風傳莫密於洞上  
號稱法窟指曰道林蓋旃檀林鬱密不與荆棘並生  
則真虎行藏豈容彪兕止住恭惟某人枯木嫡子芙蓉  
長孫應緣東吳知名南楚金篦刮膜廓開空劫光  
明寶鑑當臺頓見今時影蹟似暗中之五色如句裏  
之三玄願布龍王之太身徧施法雨要知曹源之一  
滴不離覺場

雲老送南華茶榜

一衲生涯而名聞天子萬夫阡陌而位繼祖師是必  
 於曹溪有大因緣不然乘般若昔所願力時節既至  
 毫髮弗差豈特增宗門之光抑亦為法乳之慶未忘  
 世禮少展輿情恭惟某人恩踰父母故言所不能形  
 容道絕功勳故意所不能測度雲無限礙寧分嶺外  
 湘中月有照臨豈擇曲江楚水暫駐隨軒之法侶願  
 陳薦鉢之溪蘋想蒙哀憐特有肯諾

請東明疏

雲門之宗風昔中興於雪竇而雪竇之法派今特盛  
 於臨平聲名振於諸方道德冠於列祖登其法席夫

豈庸流恭惟某人久遊臨平之門飫聞雲門之曲薄  
 遊南楚混迹東明鉢具笑移大類雲居之簡使符自  
 至未慙瀉水之詮朱紫堵觀道俗雲集升堂作象王  
 回旋則是真顧鑒酬機如師子返擲則不涉離微願  
 赴王臣外護之勤為揚針水不傳之妙

請方廣珂老住石霜

諸相本空真緣相現有言雖幻法身言傳刹那間而  
 徧十方彈指頃而說千偈妙解所寄印證其誰恭惟  
 某人頓悟上乘久臨清衆如月在水而不染似雲出  
 岫而無心車轍峯前復起靈源之浪霜華澗畔重開

枯木之華迺知龍象之擁隨定看山川之改觀幸捐  
謙柄無事巽牀

請真戒住開福

湖南報慈寺天下選佛場萬指犀顛千楹寶構宜得  
知見絕倫之士重提佛祖已墜之綱竊聞真戒禪師  
徧領名山久臨清衆受敵八面蓋文關西之家風貶  
剝諸方有英邵武之膽氣袖丹霞劈佛之手藏黃檗  
陷虎之機流出自己無窮曾襟來決先師未了公案  
瑠璃餅合寶月紫羅帳撒真珠大振南宗續千燈於  
將燼回瞻北闕祝萬壽之無疆

請雲蓋與老茶榜

禪門分江西南嶽之五派後世盛雲門臨濟之兩家  
至於流米之餘馴成戲論之誦師承大壞法道寔微  
妄庸假我以偷安名實因茲而愈濫坐冷洞上之宗  
風來振湘中之法席果逢神穎爲整頹綱恭惟其人  
芙蓉嫡孫枯木真子疎通苾衆故遇緣則應折節荷  
法故律身甚嚴名譽排縉紳齒牙威儀爲道俗指目  
誼譁沙步爭傳孤錫之重來狼藉封雲正賴清風之  
一掃敢薦蘋藻之饌用慶叢林之儀未離旃檀之林  
一句百味具足行據狻猊之座三玄五位縱橫

又藥石榜

坐致王臣之勸講蔚為緇白之榮觀脫煩籠如蟬蛻塵埃遂深隱如豹藏煙霧敢慶常規之苛禮特陳過午之伊蒲恭惟其人滿腹精神實頭聲價不往城隍聚落久藏禪板蒲團要成保社叢林敢負火力直裰以雲作蓋故我宗得妙以海為印故按指發光挾路通途則一日兩兼名刹回機轉位則四年三易道場重重錦縫解合枯木開花片片赤心果見泥牛入海特迺威重音共證明

又疏

觀名實無當而萬法本閑何必不物於物如天地不言而四時自運是謂無功之功所以有言忌犯當頭自然臨機不留朕迹其妙見於此耳孰能神而明之恭惟某人徧領名藍久臨清衆芬芝蘭之聲譽皎冰雪之行藏衣裊謝聚落之氛談笑有山林之韻一音普證萬指齊瞻海印成章檄祖令於教外寶雲作蓋施法雨於人間

嶽麓為瀉山茶榜

全提祖令則無法無親略在世禮則有恩有義故證真必依於俗諦如解空弗離於色塵故造雨花顯敘

法乳自裂衣冠以參道刺除鬚髮而為僧其長養成  
 就之私乃提撕藻飾之意至於曲折皆出愛忘俯顧  
 其微敢稱傳法之嗣仰惟至鑒又貞親教之師伏惟  
 堂頭大和尚道契天衣法傳智海廓沙界之量故能  
 山收海藏示醫王之心亦畜牛溲馬渤蠅附驥而氣  
 吞千里鈴繫鳶而聲登九霄是之固然人則幸矣躬  
 至針水之地特陳蘋藻之羞螻蟻微誠知慈嚴之易  
 感叢林苛禮愧恩大以難酬重煩四海之勝流共慶  
 一時之佳集

請圓悟住雲居

地號雲居非石梁隔分凡境世傳天上有山神常護  
 法幢須求魁壘之耆年來轄英靈之衲子恭惟某人  
 具堅亞頂門之眼行全提祖令之權舌覆大千入語  
 言之三昧身分刹海為遊戲之神通豈暇奪人境於  
 笑中何止分賓主於句內願垂巧便徇時機大震  
 海潮之音用祝後天之筭

請璞老住東禪

寺近雙峯地連七澤觀今法席號古叢林師門挺多  
 開已見之戶牖學者益眾橫臆斷之干戈紛然江淮  
 遂成阡陌賴有人中師子來為病者醫王伏惟某人

父事僧龍孫承祖印重建東山法道特弘西祖宗風  
電馳三夏之機霧谷六和之衆慈雲先布增覺苑之  
光華法雨將傾發道苗之種性

請璞老開堂

曹溪宗於天下而黃梅為得法之源達磨祖於神州  
而東禪蓋付衣之地歷觀先世勃興皆道大德全俯  
視今時嗣續多名存實廢思得逸羣者宿追還古格  
叢林果有老成來膺妙選伏惟某人行業無玷聲稱  
有聞為佛印祖印之兒孫共東山西山之雲月旃檀  
林豈生祀彫虎穴不容彪玉聚縉紳雲屯縉衲佇一

音之雷震特揚古佛之風同萬國之山呼仰祝後天  
之算

浴佛二首

已屆三時之月方議制僧絢惟四海之心皆欣浴佛  
顧茲堪恣之世復現優曇之花幸瞻貫日之光榮受  
九龍之雨百神讚歎萬衆歡呼異世今時祈勝緣之  
無盡人間天上願此會之常逢

世尊成道先浴香水天主跪歎首獻乳糜仰前哲之  
遺塵修後來之故事

祈雨

秋夏之交豐凶其辨稻稔植而未粒天日融而益蒸  
乞命真乘蕭祈景貺惟覆載之父母將呼吸其風雲  
願與無礙之慈副此有求之懇

謝雨

天道難知妄瀆凶豐之請聖慈易感下昭螻蟻之誠  
天澤不貲輿情甚慶唯確然在上者實民父母止忍  
感而遂通故如世著龜果從其願心知其幸詞不

祈晴

淹旬積雨方深傷稼之憂歸命至人願遂有秋之樂

仰蒙慈惠鑒此悃誠收廓野之層雲照麗天之杲日  
生民飽煖仰瞻天地之仁詔事簡稀實賴慈悲之力

抄華嚴經

四天下微塵偈句百河沙光明身雲聚而為秘密之  
藏傳之於震旦之土一乘所不能了解眾生其安得  
見聞而棗柏示其悲增以翰墨而為佛事造為大論  
光贊佛乘方今紙墨之費不及百千而道路之遠纒  
登五驛集百安之道種共開喜慧之福田當施積而  
能散之心成就卓然不朽之事儻蒙垂允幸注芳猷

化藏



五天祕軸二藏微言結集本藏於龍宮流傳幸出於  
 人世唯覆掌之福地蟠萬礎之寶坊獨經藏之弗修  
 如面目之有疾議將重建倚辦衆檀願歡喜以聽從  
 庶莊嚴之成就菩提園內共輪一雨春回香積臺前  
 果見十分月滿

抄藏經

無漏智所演之妙語實世福由有作心所發之志誠  
 乃人道種未之則善道已為時雨耨之則勝緣蓋其  
 良農致爵祿壽考之有年使子孫慶流之無極視其  
 因果榮如日星儻二世如來為不欺乃一切衆生為

有賴幸蒙垂允點筆疾書

重修雲庵塔

蛙朝遷而莫還弗忘其本鳥羽成而反哺蓋知其恩  
 何舍齒戴髮之可觀曾哺鳥田蛙之不若唯雲庵之  
 居無某布名山而卯塔之已頽陵夷蒼野室有朽貫  
 廩有陳紅聞之而弗完已喧餘論欲就而中較要亦  
 非人

重修舍利塔

佛書曰應靈牙舍利寶塔所在之地即是衆生植福  
 之田每觀前人之措為莫不皆有深意特建塔於五

達之衢旁臨萬瓦豈非欲為此邦植福之地乎而歲久頽毀鳥巢其頂傳曰野鳥入屋主人當去言其居衰寂也今乃巢於闐闐之間豈興盛之兆耶而邦人見之如越人視秦人之肥瘠恬不以爲意甚可羞嘆時和歲豐力至施易欲募衆檀重增修之非唯佛事莊嚴之精勤亦爲遠人入郭之雅觀垂天之雲起於膚寸千人之帳成就衆毛唯茲勝事豈曰不然

### 天寧修造

湖湘巨鎮望最重於清瀟禪律精藍名特推於萬壽作重興之意不淺緣改剏之功未完欲駕瓦之一新

擬蜂房之盡撤非棟梁無以資乎大壯非丹雘無以麗乎重明則臣僚祝頌之誠叶衆庶歸投之地矧茲勝利須假多仁希趣善者聞風而翕然冀樂施者揮金而不斲

### 天寧節功德右語

寶運儲祥驚星樞之夕遶慶雲布瑞曙日駁之朝升仰依有感之慈上祝無疆之壽伏願陛下睿齊舜禹德比堯湯履金輪之福以御天護玉真之道以應世奏和氣爲太平之曲登斯民於大有之年率土同誠幸遇千齡之嘉會瞻天鼓舞願同萬國之稱觴

化三門

唯淮山萃僧之海實祖師選佛之場必由大總持門  
 左踐普光明殿門屋今遂老矣過者疑將壓焉敢齧  
 折干于淨檀祈鼎新為之營建飛簷走棟行看掩映  
 於雲煙間碧塗金想見照臨於巖壑

長沙斃街

持地聖師以身負土雪山童子布髮掩泥蓋世界平  
 則心地平佛土淨則身土淨豈惟典刑之具在是亦  
 因果之歷然竊見長沙之通衢正當聚落之要處街  
 斃久已頽壞車馬艱於往來願興掩泥負土之勤庶

致土淨心平之効然聞洪範八政而以殖貨為先般  
 若三檀而以資生為首豈非財者人所甚愛施者行  
 所甚難苟能易其所難則當施所甚愛妙莊嚴路請  
 同放步而登大總持門要當彈指而入

為雙林化六齋

寺憑函谷門對雙峯日陳一味之禪歲仗千家之供  
 金軀灌沐始興離垢之方軟草精持次結護生之禁  
 主事枉拋油醬寒山舉拂以生瞋匿王自恣修營慶  
 喜持盂而啓教象骨輓毬之暇火焰上轉大法輪虎  
 谿種藕之餘橘盤中深談實相六時嘉會百福具崇

幸開樂施之心仰贊文明之化

化文齋果子

古格叢林新開講席偶屆書雲之節特于指廩之豪營辦勝緣精嚴法供懶納北禪之皮角且戢玄機聊續東林之橘盤未忘世禮

化儀八首

人有潔齋一日則可以祀上帝況終身潔齋者乎施惠於蛇虺尚致銜珠之報況賢於蛇虺者乎石門精舍始以單丁住持盛至于傳器極矣乃者勝侶遠集至十九輩始於遠公之社盡皆所謂潔齋者也有能

施而供之者乎恐不趨銜珠之報也

首楞嚴經曰昔有衆生施佛七錢轉身獲轉輪王位嗚呼博施之利其利溥哉審如佛言則施者取福如執左券以取寓物多得之非受者之喜少與之受者田其所增損也唯不於佛語生清淨信而以富貴驕入則是待遊說鋤鑿者事非所宜施於雲山高人也施以求福如種須刈雖不可必未能無意凡貴與賤與夫愚智皆能知之無所用說但幸有緣見聞生喜出其誠心則名淨施如其不然詬罵怒恚推擠閉關無所不至設或與之出不得已則施與受皆無福利

誠開金石德感天地豈有高明以倅自蔽耶  
竊聞人莫不有忠孝之心而士君子獨能善用此心  
故願祝吾君之壽及營其親福祉者皆依佛僧具世  
之福田也湘中為僧之都會南臺又其要處耒陽禮  
義之鄉士君子甚眾遠投之必有欣然而施者也解  
劔指原當無愧於古人幸甚幸甚  
柔和不譴清淨自活以三東為寄寓以一鉢為生涯  
故世尊曰以飲食臥具園林樓觀施之者獲福無量  
僧蓋為福田所從來舊矣今人欲植福而棄僧如種  
稻而棄田也

著靴人喫肉赤脚人趁兔理有固然非特古語今日  
若施一錢他生莊嚴自具譬如寓物於人而執左券  
索取綫溜達石眾毛成毬豈可以小善為無益而不  
積以多福為難致而不求哉

南臺鉢飯是生涯近取邵陵檀施家不覺香積路迢  
遠更過四十二恒沙

化油炭二首

石霜枯木寒灰都忘世禮藥山草衣橡食略露家風  
南北隨緣任運尚求冬煖夏涼今歲鬱密堂深猶少  
炭鑪紅火有忠道者潛來獻誠要令坐對紅金寶藉

十方檀信醉餘一擲之戲化爲海衆冬溫它日果證菩提頓超暖忍頂地當寺依山林有原隰以累年律居皆斫伐荒廢以是逐年油炭尚須千人今歲尤不熟麻油價騰湧樵薪已竭而寒凝日增雖欲安坐其可得乎約用三十千便成光明便化溫煖

長生疏

九峯院名崇福百年供號長生適丁新年特爲吉兆果施桑門之惠如除氈上之毛然衆毛乃能成毳一夫不可勝敵敢于衆力同成大緣

化供二首

當寺依湘上瀕楚水基於隋朝盛於唐季有道俊禪師者雲門之高弟聚徒於其間語句播於叢林號爲水西南臺皇祐間廢爲律然古格尚存薦經儉歲住持者棄去山林厄於斤斧屋宇化爲草棘至以田丁膺門今年春州郡易以禪者領之於是明白老自鹿苑移居此而衲子追逐而至遂成叢席然懼其有增而無損故分化於四方嗚呼損有餘而補不足天道固爾然以至易犯至難人情所疑苟非已身所私則鬼神且陰相之況賢者乎

信心一念諸佛皆知辦供一夫諸天降福此天下必然之理故至誠確意皈投願施積而能散之心成就遠劫無窮之利

明白庵在何許舊白水西南臺粥飯雖未飽足大言要接方來水盈科而必進箭在弦無返固不愁天廚香積但願施者心開

德士復僧求化二首

寺雖律名堂迺衲子續香燈於永夕紛禪誦以成羣坐使古風行於今由一昨教門小有更變加以冠巾竭來聖恩大為發揚再除鬚髮懽聲震於夷夏喜氣

動於龍天著舊僧衣雖限一歲換新度牒必輸五千而家在異鄉客於賢里清淨自活望之如登天之難檀信可干成之若反掌之易必有深憐之者願施不報之恩

去年春朝廷以鉢食膜拜為西國之儀乃詔僧尼令衣褐頂冠從中華之俗比奉聖恩許還舊觀人神交慶夷夏增懽仰惟聖主之心寔通天下之志然每一名之度牒必輸五緡於有司如須必濟之舟如望及時之雨顧惟齒髮之外凡皆檀信可成敢領衆一登高門願因時以成勝事所施雖少其利甚豐

求度牒僧衣五首

竊念生於七閩長游三楚以檀施為依仗以佛法為家鄉十載事師共憫忠勤之効一心荷眾咸稱勞苦之先念國恩澤之未洽僧寶數之難墮萬里之行起於初步千人之帳藉於眾毛願成出塵之姿將赴選佛之舉既蒙開意而諾矣幸為點筆而疾書蓋聞相如以貫為郎釋之輸粟入仕冠於終古赫為名鄉欲我緇衣結髮佛教既買僧不許選佛則用財不得守官念其生於東甌長於南楚倚妙典求登三聚值聖主暫罷三年終營道儀依倣俗慮仰冀仁惠

成就夙心三塗升濟終賴佛慈六度莊嚴先依檀信仁人難值如盲龜之木欣然易感如磁石之鍼獲披廣大福田之衣而入清淨和合之眾酒醯樂極棄一擲呼盧之資願遂志酬成三寶出塵之相報恩有在唯佛證知

出家報四重之恩為一大事剃髮墮三寶之數豈是小緣須干祇樹之檀披此福田之服千里之水本發於濫觴六合之雲實起於膚寸恩遺有四而檀信居其一福慧有二而富貴居其先但其生於寒鄉客於華里欲遂選僧之志敢忘擇富



之求成就勝緣恩非同日經營妙善道不虛行  
三界火宅衆苦業城既無了期實堪驚歎返復以念  
無可依投親舊欲與謀婚心志乃願棄俗年將遲莫  
事恐滯留敢投淨信之檀圓滿六和之相成佛作祖  
始自今朝異世他生終期報德誓將焚誦之志用酬  
提挈之恩

雲蓋智和尚設粥

今晨香粥普告大衆圓明體上離見離情安立諦中  
有恩有義智和尚三月七日現全身於雲蓋甘露滅  
五月三日提綱奠於石門佛法現前恩義俱報

又凡大祥看經

姪苾芻某伏遇亡叔協律大祥之晨預誦金文宣持  
祕號所集殊因並申資薦往生淨國者謹具功德疏  
于後右伏以恩愛別離同謂之苦死生壽夭已定於  
緣欲洗濯其苦因必依投於僧佛某人伏念俱緣利  
國致禍及身豈意一朝遂成千古脫瘴鄉其偶爾登  
堂室之闐然諦想音容疑遠遊之未返難居歲月俄  
大祥之已臨寡孀弱孤持骨困而若絕偏親幼弟拜  
奠酌而長號皇天唯予善人此理殆成虛語疾方增  
熾哭不成聲仰仗真乘用資冥福伏念亡叔協律依

如來無畏慈力生菩薩有緣悲心摧落業障之山倍  
增功德之海一念透脫六根頓明已在人間聰明更  
益其念尚留惡道慧明即觸其身夾結龍華之後期  
同副靈山之夙願

酬經願

近緣脫身海島犯難來歸所經歷州縣僅三十城出  
入瘴鄉餘四千里無秋毫之恐有太山之安皆神之  
休成已之幸唯所許願敢昧初心已延佛僧預開經  
法以八月之朔對三寶之前敘事之因設齋以懺恭  
惟十身滿覺萬德貞慈俯賜哀憐爲之作證

薦經

三藏祕詮一乘妙義真寫法界之圖牒絕苦海之舟  
航特延清淨之苾芻羣誦旁行之貝葉庶憑此利上  
迨我先伏願妙具信心深依法力超登覺苑導從願  
王獲聞迦陵頻伽之音親瞻閻浮檀金之相脫有爲  
之塵垢證無量之聖身

生辰四首

大行所熏如春與物等慈無礙似谷應聲虔當誕慶  
之辰特集延祥之福誦持法藏增益壽祺伏願追迹  
喬松比功契稷和氣作生民溫煖朴忠爲社稷垣牆

永護佛僧不忘願力  
瑞應草之迎春方開八葉優曇華之出水果秀一枝  
仰祝壽祺用延福祉伏願與民溫飽為國著龜天上  
風霜難老娑婆之桂人間歲月敢移道德之容永護  
佛乘早調相鼎

今節屆辰過中元之七日美名瑞世鍾爽氣於三秋  
仰祝壽祺實依法力伏願吉祥叶相戩穀茂滋輔明  
主禔太平之基與生民作溫飽之具自計臺而進拜  
追還大范之遺風由館職以超遷恢復小蘇之故事  
八葉瑞賞冠三春之淑景一枝優鉢間千載之榮期

歸命佛乘上延台筭伏願勤勞王室護衛法門詔旨  
三湘即受金甌之拜便登二府果膺玉板之榮瞻僊  
風道骨以祝壽祺比太山黃河而增福祉

追薦四首

精誠之極必感真慈冥福所資實依法力唯賢明之  
秉志享福壽而有終然夜壑山舟寧沒終天之痛而  
風枝淚眼難忘罔極之思願乘淨供之因超薦往生  
之路

大慈至悲寔作生靈之祐他心慧眼必昭螻蟻之誠  
仰賴真乘用資冥福伏願一靈不昧六用潛通瞻眉

際白玉明毫禮天中紫金光聚諸天證樂異趣頓超  
 歲月易流永抱終天之痛音容如在難忘罔極之悲  
 歸命真乘式修冥福伏願頓脫三塗之苦長辭五障  
 之軀清淨諸根瞻萬德紫金光聚熏蒸眾善拜十身  
 白玉明毫聞妙法以洗妄緣悟無生而登彼岸  
 舟移夜壑驚諱日之俯臨蟬蛻塵埃睇道山之已遠  
 欲資冥福實賴真乘伏願熏菩薩知見之香依如來  
 功德之力滌除千障清淨六根親瞻白玉之明毫敬  
 禮紫金之光聚餘緣未盡他生願會龍華感習既空  
 應念頓超覺路

次平赴省試設水陸

清淨寶王永作人天之護圓明慧眼必昭螻蟻之誠  
 某比下侍親望希薦舉果諧素志已叶庸情稽首真  
 慈虔誠歸命更願學增通力筆助神奇庶榮白首之  
 雙親必取青衫之一第  
 石門文字禪卷第二十八

丹陽居士賀學仁保男懋初愛燈共施贊刻此  
 石門文字禪第二十八卷海塩了緣居士對  
 長洲徐普書建陽鄒大成刻  
 萬曆丁酉仲冬徑山興聖萬壽禪寺識

Faded vertical text on the right side of the page, likely bleed-through from the reverse side.

Faded vertical text column, part of the bleed-through.

Faded vertical text column, part of the bleed-through.

Faded vertical text column, part of the bleed-through.

Faded vertical text column, part of the bleed-through.

Faded vertical text column, part of the bleed-through.

Faded vertical text column, part of the bleed-through.



